



Paraser:

Projetu Lei Nú. 17/VI (3a) kona-ba alterasaun Dahitu ba Kódigu Penál

Dirije ba:

Komisaun A Parlamentu Nasionál

Tabela Konteúdu

I. Introdusaun.....	2
II. Observasaun jerál	2
2.1. Insestu.....	2
2.2. Asédiu Seksuál	3
III. Preokupasaun kona-ba kriminalizasaun difamasaun no injúria	4
IV. Efeitu ka risku potensial sira hosi kriminalizasaun difamasaun no injuria....	5
4.1. Efeitu ne'ebé maka'as iha liberdade espresaun nian.....	5
4.2. Risku abuzu esesivu husi autoridade sira	5
4.3. Halo fraku Estadu demokrátiku.....	6
4.4. Luta kontra korrupsaun sei defisil liutan iha futuru	6
4.5. Konflitu potenciál ho obrigasaun direitus umanus internasionál sira...	7
4.6. Risku husi aplikasaun seletivu/diskriminatoriu (tebang pilih)	7
4.7. Hatodan serbisu polísia no administrasaun justisa tomak	7
V. Observasaun no proposta espesífiku ba artigu sira	8
VI. Konklusaun.....	9

I. Introdusaun

Uluk nanain, JSMP hakarak kongratula no manifesta apresiasaun kle'an ba deputadu Komisaun A Parlamentu Nasional (PN) ba iniciativa introdusaun norma progresivu importante sira-ne'e hodi hametin liután protesaun ba vítima krime natureza seksuál sira no fó onra ba dignidade umana. Partikularmente JSMP apresia distintu/a deputadu/a sira ne'ebé sensivel no atentu ho evolusaun fenomena sosiál sira ne'ebé durante ne'e akontese iha sociedade. JSMP nia apresia espesiál ba Parlamentu Nasionál ba iniciativa hodi kriminaliza 'insestu' hodi bele salvaguarda valór kulturál, relijozu no familia Timor-Leste nian.

Iha parte seluk, kestaun difamasaun maski JSMP konsiente katak protesaun ba onra no reputasaun ema nian hanesan responsabilidade lejítimu ne'ebé Konstituisaun rekoñese no proteje, maibé utilizaun direitu/lei penál atu kriminaliza no kondena espresaun ka kítika sira hamosu preokupasaun kona-ba kestaun konstitusionál oioin, liuliu bainhira espresaun hirak-ne'e relasiona partisipasaun atividade sidadaun sira ba interesse públiku, promosaun transparénsia no akontabilidade governativa, enkoraza prestasaun serbisu no luta kontra korrupsaun.

Bainhira Timor-Leste adota no introdús difamasaun hanesan ofensa kriminál iha Kódigu Penál, sei iha risku legál, polítiku, no direitus umanus potenciál oioin ne'ebé bele mosu no kria konfuzsaun norma sira iha Konstituisaun.

Alende obrigasaun konstitusionál sira ne'ebé Estadu tenke kumpri, preokupasaun kona-ba restrisaun ba liberdade espresaun sira apresenta beibeik hosi organizaun internasionál direitus umanus sira, inklui Komité Direitus Umanus ONU nian, nu'udar konsekuénsia hosi membru Estadu parte ba Konvensaun Internasionál sira ne'ebé Timor-Leste ratifika.

Iha JSMP nian paraser ne'e, koko apresenta observaun jerál no analiza espesifika ba artigu sira balun tuir JSMP nia analiza no interpretasaun sira.

II. Observasaun jerál

2.1. Insestu

Introdusaun "insestu" reprezenta pasu importante ida atu reforsa medida legál protesaun relasaun familiar no interese superiór membru família sira, partikularmente labarik no liuliu kestaun konsentimentu la'os ona. Artigu ketak ba konduta ida-ne'e demonstra katak Estadu rekoñese gravidade violasaun konfiansa no autoridade ne'ebé normalmente akompaña relasaun familiar. Alende proteje moralidade familiar, dispozisaun ida-ne'e mós kontribui ba prevensaun abuzu no eksplorasauun seksuál ne'ebé bele akontese iha ambiente doméstiku.

JSMP iha tempu naruk mak halo monitorizasaun ba iha tribunál sira iha Timor-Leste no bazeia dados sira ne'ebé JSMP monitoriza, rejista mós kazu balun, liuliu hahú hosi 2012 to'o 2026 hamutuk 92 ne'ebé konstitui aktu insestu no entre kazu sira ne'e, balun labele hetan kondensasaun tanba la konstitui elementu sira krime violasaun nian katak aktu insestu ne'e akontese tanba 'hakarak ho hakarak ka konsentimentu'. Kódigu Penál la kriminaliza insestu, maibé prevee de'it sirkunstánsia sira ne'ebé bele lori ba hatodan ka agrava pena sira iha krime sira hanesan aktu seksuál no abuzu seksuál.

Iha prátika vítima hosi inestu ne'ebé mak molok tinan 14 bele hetan protesaun hosi artigu 177 kona-ba abuzu seksuál ba menór hamutuk ho artigu 182 kona-ba agravasaun tanba relasaun familiár. Enkuantu vítima sira ne'ebé mak tinan 14 ba leten hetan protesaun hosi artigu 171 no 172 Kódigu Penál (KP) kona-ba violasaun seksuál no koasaun seksuál hamutuk ho 173 kona-ba agravasaun bazeia ba relasaun familiár, maibé ba vítima ne'ebé tinan 14 ba leten hetan protesaun limitadu. Signifika katak sira so hetan protesaun de'it bainhira bele prova katak arguidu "uza violénsia ka ameasa grave atu halo relasaun seksuál no vítima tenke reziste. Bainhira elementu prova hirak-ne'e la provadu iha tribunál, dalabarak konsidera ida-ne'e nu'udar aktu **konsentimentu**. Ida ne'e mak limitasaun todan iha Kódigu Penál Timor Leste nian.

Situasaun ne'e hamosu preokupasaun JSMP nian tanba aktu seksuál ida ne'e kontráriu ona ho valór kulturál no relijozu sira ne'ebé sai ona hanesan hun ka fundamentu ho natureza ka karáter ka identidade povu no nasaun Timor nian. Nune'e, JSMP decide hodi halo peskiza, analiza no advokasia ba kriminalizasaun ba aktu inestu ka aktu relasaun seksuál entre membru família iha grau relasaun ran iha liña reta iha parte asendente no desendente no mós determinadu grau balun iha liña kolateral, partikularmente iha grau datoluk: hanesan bandu aktu seksuál ho natureza inestu entre feton ho nan no feton ka nan ho nia subriñu ka subriña sira, maibé bainhira liu ona hosi grau ida ne'e, grau dahaat (4) ba leten, bainhira iha konsentimentu, lei sei la bandu. Hanesan aktu seksuál ne'e akontese entre primu ka prima sira (liña kolateral grau dahaat (4)) tuir lisan Timor nian 'fetosaun umane'.

Nune'e, iniciativa Parlamentu Nasionál nian, liuliu Komisaun A hodi kriminaliza inestu hanesan iha ezbosu lei ne'e, JSMP konsidera estremamente importante atu bele salvaguarda valór kulturál, relijoza no família Timor-Leste nian no bele prevene aktu seksuál ne'ebé hanesan iha futuro.

Hosi parte seluk, JSMP haree katak iha ezbosu lei ne'e haluan tan ona definisaun termu inestu ne'e hakat liuhosi relasaun ran (sanguina) to'o relasaun ba membru família íntima laiha relasaun ran hanesan oan haki'ak (adotadu) no entiada. JSMP nia parte hanoin katak bele haluan tan, maibé se distintu deputadu sira hanoin karik di'ak liu atu bele hili tan termu apropriadu ida ba iha kriminaliza aktu seksuál ne'ebé akontese ho membru família íntimu ne'ebé laiha relasaun ran, ne'e mós JSMP nia parte konkorda. Hanesan ezemplu bele tau 'aktu seksuál inestu no aktu seksuál ho família íntima'. Nune'e, bele termu 'inestu' ne'e bele aplika de'it ba iha aktu seksuál ne'ebé iha ligasaun ran.

Relasiona ho definisaun moldura penál, JSMP haree katak pena minima ne'e ki'ik liu. Hanesan krime públiku, JSMP sujere atu pena mínimu hahú hosi tinan 3 ba leten, nune'e, atu lalika iha suspensaun, mezmuke nia gravidade ne'e ki'ik. Nune'e, bele prevene ka halo komidade tauk prátika aktu sira ne'e (proposta artigu ne'ebé JSMP propint ba alterasaun bele haree iha parte V iha kraik).

2.2. Asédiu Seksuál

Asédiu seksuál ne'e, tuir JSMP nia observasaun durante ne'e, mosu dala barak iha mídia sosiál no nótisia sira hatudu katak iha individu balun ho kbiit ka autoridade halo aktu sira ne'e no vítima sira balun halo keixa no balun la iha. Mezmuke halo keixa, maibé labele halo prosesu judisiál bainhira la konstitui krime. Nune'e, JSMP

hanoin, importante atu bele kriminaliza aktu ne'e, mezmuke iha krime semi-públiku de'e. Ho nune'e, bainhira iha ema ruma sente prejudikadu ho aktu sira asédiu seksuál bele halo keixa no ida ne'ebé la sente prejudika la nesesariamente ema seluk halo denúnsia.

Kriminalizasaun asédiu seksuál reflète rekoñesimentu katak forma sira hosi komportamentu seksuál indesejadu bele afeta gravemente dignidade, liberdade no seguransa vítima sira. Kriminalizasaun ba aktu ne'e, hatudu katak lei penál la limita de'it ba asaun sira ne'ebé envolve violénsia fízika, maibé mós rekoñese impaktu psikolójiku, morál no sosiál ne'ebé kauza hosi komportamentu hirak-ne'e. Medida ida-ne'e nu'udar armonizasaun ba ordenamentu jurídiku nasional ho padraun internasionál sira kona-ba igualdade jéneru no prevensaun violénsia bazeada ba jéneru.

III. Preokupasaun kona-ba kriminalizasaun difamasaun no injúria

Kriminalizasaun difamasaun no injúria sai tema ida ne'ebé kontinua provoka debate boot iha Timor-Leste durante dekade hirak ne'e liuliu debate sira ne'ebé relasiona ho prinsípiu Konstitusionál sira ne'ebé preve iha artigu 40 Konstituisaun direitu ema hotu-hotu nian atu espresa no divulga sira-nia hanoin no opiniaun livremente. Direitu ida-ne'e sai elementu esensiál ba partisipasaun sidadaun nian iha vida pública no ba fiskalizasaun atividade autoridade estatais sira.

Maske nune'e, Konstituisaun rasik rekoñese katak ezersisiu direitu ne'e bele sujeitu ba limitasaun legál sira ne'ebé nesesáriu atu proteje direitu no liberdade ema seluk nian, inklui direitu ba onra, naran-diak no reputasaun. Tanba ne'e, protesasaun jurídika ba reputasaun ema nian representa objetivu legítimu ida iha sociedade democrátika.

Iha parte seluk, preokupasaun relevante hosi perspetiva direitus umanus internasionál kona-ba utilizasaun mekanizmu penal atu responde ba alegasaun difamasaun no injúria. Komité Direitus Umanus Nasoens Unidas, liuhosi interpretasaun Artigu 19 hosi ICCPR, hateten katak estadu sira tenke evita imposisaun sansaun penal ba ezersísiu liberdade espresaun, partikularmente bainhira espresaun refere ba asuntu interesse públiku ka kritika hasoru autoridade pública sira.

Preokupasaun sentrá mak kriminalizasaun difamasaun bele kria "efeitu intimidatóriu", ne'ebé halo jornalista, ativista, akadémiku, defensor direitus umanus no membru sociedade sivíl sira evita hato'o kritika ka investigasaun kona-ba materia sira relasiona ho interesse públiku, governasaun ka komportamentu ofisiál estadu sira tanba ta'uk ba prosesu kriminál. Situasasaun ida-ne'e bele halo-fraku transparénsia, akutabilidade públiku no debate democrátiku ne'ebé importante ba governasaun ida ne'ebé respeita Estadu-Direitu.

Iha kontestu Timor-Leste, preokupasaun ne'e aumenta tan bainhira krime difamasaun no injúria bele aplika ba deklarasaun sira ne'ebé liga ho atividade polítika ka fiskalizasaun autoridade pública. Jurisprudénsia internasionál no padraun direitus umanus barak sustenta katak ema ne'ebé okupa kargu públiku tenke aseita nivel toleránsia aas liu ba kritika duké sidadaun privadu sira, tanba sira voluntariamente envolve an iha esfera pública no sujeitu ba eskrutíniu públiku.

IV. Efeitu ka risku potensial sira hosi kriminalizasaun difamasaun no injuria

4.1. Efeitu ne'ebé maka'as iha liberdade espresaun nian

Bainhira ema hatene katak sira bele hasoru investigasaun kriminal no prosesu judisiál oioin ne'ebé sei hasoru kastigu iha prizaun ka multa tanba deklarasaun sira ne'ebé konsidera estraga ka ofende ema ida nia reputasaun, ema barak sei hili dalan seguru evita ko'alia kona-ba asuntu sira ne'ebé iha interese públiku. Risku potenciál sira ne'e bele afeita partikularmente ba:

- Jornalista sira
- Defensór direitus umanus sira
- Organizasaun sosiedade sivil sira
- Akadémiku sira
- Movimentu estudante sira
- Grupu opozisaun sira iha liur/laos iha PN
- Sidadaun baibain sira ne'ebé babain uza mídia sosiál

Iha realidade sistema justisa ne'ebé hasoru dezafiu no kompleksidade oioin hanesan ohin loron PN tenke avalia ho rigor no prudensia implikasaun relevante sira ne'ebé bele hatodan liutan sistema justisa formal dadaun ne'e hasoru dezafiu oioin, purzemplu:

1. Polisia sira sei gasta tempu barak liu atu halo persegisaun ba individu sira bainhira simu keisa hosi lider polítiku ka ofisiál públiku sira duké fó prioridade ba ordem publiku);
2. Prokurador sira no juis sira iha tribunál sei gasta tempu, enerjia no rekursu sira hodi atua kestaun sira ne'ebé tuir loloos tama iha materia ka dominiu privada nian;
3. Iha realidade ne'ebé diferensia sosial boot hanesan iha Timor-Leste ohin loron, provizaun ne'e sei benefisia barak liuba ema sira iha poder, iha kbiit no rekursu duké povu babain;
4. Maski dalaruma prosesu hasoru ema ruma ikusmai absolvidu, maibé prosesu ne'e halo ema sei sente trauma ka esperensia tauk ba kapturasaun, interrogatóriu, prosesu tribunál, no kustu legál sira ne'ebé bele dezenkoraja krittika públika.

4.2. Risku abuzu esesivu husi autoridade sira

Artigu ka provizaun kriminal kona-ba difamasaun bele fó dalan ba autor sira hanesan:

1. Ofisiál governu nian
2. Ministru sira
3. Deputadu sira
4. Empreza boot sira ka ema sira seluk ne'ebé maka iha kbiit atu hamete krittika publika ka espresaun ba interese publiku sira.

Artigu ne'e sei fo vatajem ba lider politiku no empresa sira hodi loke prosesu kriminal sira hasoru ema sira ne'e halo krittika hasoru sira. Ida-ne'e perigu ba demokrasia

tanba autoridade sira uja sistema legal (lei penál) sai hanesan instrumentu ida atu proteje podér politiku, limita partisipasaun ativu sosiedade no hamate kontrolu sosiál no ezaminasaun públiku asuntu sira ne'ebé envolve interese públiku.

4.3. Halo fraku Estadu demokrátiku

Demokrasia signifika iha espasu nakloke no livre ba sidadaun sira atu avalia, ezamina, kestiona, inklui halo protestu hasoru:

1. Desizaun sira Governu nian ne'ebé la justu;
2. Kontrola despeza públika
3. Divulga indikasaun irregularidade no alegasaun korupsaun
4. Kontrola konduta judisiál
5. Ezamina polítika públika sira

Bainhira krítika lori risku ba alegasaun krimínál no kastigu, se la iha ema barak maka bele prontu atu divulga hahalok aat sira no ema barak liu mak sei hili silensia hasoru injustisa sosial.

Iha prátika, jurnalizmu investigativu sira no relevasaun/deskobrimentu indísiu korupsaun sei hasoru dezafiu boot tanba jornalista sira dalabarak depende ba informasaun ne'ebé susar atu verifika kompletamente molok publikasaun.

4.4. Luta kontra korupsaun sei defisil liutan iha futuru

Preukupasaun sentral seluk mak bainhira estadu kriminaliza difamasaun sei rezulta;

1. Risku difamasaun sei prejudika teb-tebes esforsu sira kontra korupsaun. Kriminalizasaun ba difamasaun bele kria efeitu ne'ebé halo ema lakon vontade, korajem atu divulga ka releva aktu korupsaun sira iha instituisaun publiku no privada sira;
2. Korupsaun dalabarak difisil teb-tebes atu deskobre iha inisiu. Se funsióariu públiku ida se deskonfia katak iha indikasaun kona-ba uza sala fundu publiku sira iha instituisaun laran maibe seidak iha evidensia dokumental hotu-hotu.

Se difamasaun krimínál eziste, funsióariu ne'e bele tauk tanba se nia fó sai nafatin nia sei hasoru: investigasaun no prosesu krimínál; internalmente konsidera katak la leial ba superior no sei iha rejistu krimínál no indisiplinar; sei iha vingansa, lakon oportuidade ba promosaun ka oportuidade sira seluk. Ida ne'e rezulta, ema ne'e bele decide atu la fó-sai ka divulga indikasaun hirak ne'e ba autoridade relevante sira;

Purezemplu: Ofisiál aprovizionamentu ida nota irregularidade sira iha kontratu konkursu publiku sira governu nian. Duké relata kestaun ne'e ba autoridade ka mídia, nia nonook de'it tanba Diretor ka Ministru ne'ebé envolve bele hato'o keixa difamasaun krimínál hasoru nia.

3. Funsióariu sira sei la hola risku atu trava irregularidade sira no sei hili dalan nonok maske sira hare irregularidade barak iha instituisaun públiku sira bainhira sira la iha prova suficiente sira sei decide takaibun ka nonok nafatin.

4. Jornalista sira bele evita publikasaun relatoriu investigativu sira – iha prátika jurnalizmu investigativu hanesan instrumentu ida ne'ebé efektivu liu atu deskobre aktu korrupsaun.

Eskándalu korrupsaun boot barak iha mundu tomak inisialmente deskobre hosi jornalista sira molok autoridade sira hanesan CAC no Ministeriu Públiku sira envolve.

Bainhira jornalista sira hasoru potencia ba kriminalizasaun tanba publika alegasaun sira hasoru poder boot sira ka sira ne'ebé kaer hela ukun, editór sira bele decide; atu la publika nutitisia ne'e; elimina tiha informasaun sensivel; prevene ka evita investiga ema sira ne'ebé iha ligasaun ho poder polítiku sira.

4.5. Konflitu potenciál ho obrigasaun direitus umanus internasionál sira

Komité Direitus Umanus Nasoins Unidas nian subliña beibeik katak restrisaun sira ba liberdade espresaun nian tenke nesesáriu no proporsionál tuir Artigu 19 hosi Pakto Internasionál kona-ba Direitu Sivil no Polítiku sira.

Aleinde ne'e peritu internasionál barak sujere opsaun ideal liu ba proteje reputasaun no onra mak liuhosi medida remédiu sivil tanba kriminalizaun difamasaun dala barak la proporsionál no utiliza la apropiadamente. ARTIGU 19 Konvensaun Direitu Sivil Politiku no organizaun direitus umanus sira defende **deskriminalizasaun** totál ba difamasaun no enkoraja media sivil liuhosi prosesu sivil.

Tanba Timor-Leste nu'udar estadu parte ba konvensaun hirak-ne'e, kualkér provizaun kriminál kona-ba difamasaun sei kontradisaun hasoru padraun internasionál sira-ne'e.

4.6. Risku husi aplikasaun seletivu/diskriminatoriu (tebang pilih)

Preokupasaun seluk mak lei sira difamasaun kriminál nian bele la aplika hanesan.

Purezemplu:

1. Ema sira ne'ebé kritika governu bele hetan prosesu.
2. Apoiante sira governu nian bele la hasoru asaun hanesan.
3. Kazu sira ho perfil aas bele hetan atensaun enkuantu kazu baibain sira ignora.

Ida-ne'e bele hamosu persesaun kona-ba prejuizu polítiku no estraga konfiansa iha sistema justisa.

4.7. Hatodan serbisu polísia no administrasaun justisa tomak

Disputa sira kona-ba difamasaun konsidera nu'udar disputa iha dominiu privada/pesoal sira kona-ba reputasaun, onra no dignidade. Bainhira lori ka trata hanesan pesoal ba asuntu kriminál, sei gasta despeza boot ba:

1. Rekursu polísia nian
2. Rekursu sira prokuradoria nian

3. Rekursu no tempu tribunál
4. Ignora kazu importante sira ne'ebe ne'ebé envolve interese publiku hanesan kazu korrupsaun no krime transnasionál sira;

Tanba ne'e peritu sira rekomenda duke kriminaliza asuntu iha dominiu privada sira prefere atu reklama liuhosi aprosimsaun no mekanismu sira hanesan:

1. Prosesu sivil ne'ebe rezulta indemnizaun ka kompensasaun sivil
2. Direitu ba resposta
3. Retira fali deklarasaun ka liafuan hosi pubiku, no
4. Husu deskulpa públiku

V. Observasaun no proposta spesífiku ba artigu sira

Depoizde halo tiha leitura ba artigu ne'ebé Parlamentu Nasional propoin ami nota katak iha preokupasaun balun relasiona ho moldura penál iha projetu alterasaun ne'e ki'ik liu fali krime natureze seksuál sira iha KP. Alende ne'e, JSMP mós inklui poder ka autoridade nu'udar interese superiór hasoru membru família. Tanba ne'e, ami prepara ona proposta alternativa hodi refleto gravidade krime ne'ebé envolve membru família rasik.

Artigo 40.º-F Incesto

1. Quem praticar coito vaginal, coito anal ou coito oral com membro familiar relevante, ou introduzir qualquer objeto no ânus ou vagina de um membro familiar relevante, quando sobre este dispuser de poder presentemente ou no momento em que a atividade sexual entre essas pessoas aconteceu pela primeira vez, é punido com pena de prisão de 10 a 20 anos.
2. Quem cometer qualquer ato sexual relevante sem penetração com membro familiar relevante, quando o agente dispuser de poder sobre o membro familiar relevante, presentemente ou no momento em que a atividade sexual entre essas pessoas aconteceu pela primeira vez, é punido com pena de prisão de 5 a 15 anos.
3. Considera-se o membro familiar relevante mencionado nos números 1 e 2 o parente do agente em linha reta ascendente ou descendente ou colateral até o segundo grau, inclusivo por adoção ou filho entiaada.
4. O poder, mencionado nos números 1 e 2, é a capacidade de o agente influenciar ou controlar o comportamento de outra pessoa, por meios físicos econômicos, psicológicos ou emocionais. Deve-se avaliar o exercício do poder de acordo com todas as circunstâncias, incluindo as idades de agente e vítima, seus gêneros, posições nas famílias, nível educacional e dependência ou independência econômica.
5. Nos números 1 e 2, o consentimento do membro familiar relevante é prescindível.
6. Quem praticar os atos referidos nos números 1 e 2 contra menores de 18 anos é punido com pena de prisão de 12 a 25 anos nos casos previstos no número 1, e de 8 a 20 anos nos casos previstos no número 2.

Versaun Tetun:

Artigu 40-F Insestu

1. Sé mak halo relasaun vajinál, anál, ka orál ho membru família relevante, ka hatama objetu ruma iha membru família relevante nia anus ka vájina, bainhira iha podér ba membru ne'e agora daudaun ka iha momentu ne'ebé atividade seksuál entre ema sira-ne'e akontese ba dala-uluk, sei hetan kastigu prizaun tinan 10 to'o 20.
2. Sé maka komete aktu seksuál relevante ruma laho penetrasaun ho membru família relevante, bainhira autór iha podér ba membru família relevante, agora daudaun ka iha momentu ne'ebé atividade seksuál entre ema sira-ne'e akontese uluk, sei hetan pena prizaun tinan 5 to'o tinan 15.
3. Membru família relevante ne'ebé temi iha número 1 no 2 konsidera nu'udar perpetrador nia parente iha liña direta asendente ka desendente ka parente kolateral to'o terseiru grau, inklui ho oan adosaun no oan entiada.
4. Podér ne'ebé temi iha parágrafu 1 no 2 mak ajente nia abilidade atu influénsia ka kontrola ema seluk nia hahalok liuhosi meiu fíziku, ekonómiku, psikológiku, ka emosionál. Ezersísiu podér nian tenke avalia tuir sirkunstánsia hotu-hotu, inklui ajente no vítima nia idade, sira-nia jéneru, pozisaun iha família sira, nivel edukasaun, no dependénsia ka independénsia ekonómika.
5. Iha parágrafu 1 no 2, la presiza konsentimentu hosi membru família relevante.
6. Ema ne'ebé komete hahalok sira ne'ebé temi iha número 1 no 2 hasoru menór ho idade tinan 18 mai kraik sei hetan pena prizaun tinan 12 to'o tinan 25 iha kazu sira ne'ebé prevee iha número 1, no tinan 8 to'o tinan 20 iha kazu sira ne'ebé prevee iha número 2.

VI. Konklusaun

Ba Timor-Leste importante tebes atu regula no kriminaliza insestu hodi bele salvaguarda valór kulturál, relijiozu no família, liuliu prevene aktu seksuál ne'e iha futuru.

Ba Timor-Leste, risku prinsipál sira hodi kriminaliza difamasaun maka:

1. Hamate direitu konstitusional ba liberdade espresaun.
2. Auto-sensura entre jornalista no sidadaun sira.
3. Uzu sala ne'ebé poténsial hosi elite polítika ka ekonómika sira.
4. Hamenus responsabilizasaun governu nian.
5. Kontra-proditivu ho padraun direitus umanus internasionál.
6. Hamate partisipasaun ativu sidadaun sira iha prosesu dezentvolvimentu nasional no debate públiku.

Husi perspetiva konstitusional no direitus umanus, peritu internasionál sira, JSMP hanoin katak PN bele reforsa esforsu sira ba protesaun ba reputasaun bele hetan liuhosi remédiu sira lei sivíl nian duké liuhosi kriminalizasaun.